



XUNTA DE GALICIA

CONSELLERÍA DE POLÍTICA
SOCIAL

Dirección Xeral de Familia, Infancia
e Dinamización Demográfica



MEMORIA DECLARACIÓN

(Artigo 15.2. da Lei 1/2016, de 18 do xaneiro, de transparencia e bo goberno)

CONVENIO DE COLABORACIÓN ENTRE AS CONSELLERÍAS DE POLÍTICA SOCIAL E DE EDUCACIÓN, UNIVERSIDADE E FORMACIÓN PROFESIONAL, A ASOCIACIÓN ABUSO E MALTRATO INFANTIL NO. GALICIA (AMINO.GAL) E AS UNIVERSIDADES DA CORUÑA, SANTIAGO DE COMPOSTELA E VIGO, PARA A FORMACIÓN, DIFUSIÓN E SENSIBILIZACIÓN NO EIDO DA VIOLENCIA SEXUAL INFANTIL

A directora xeral de Familia, Infancia e Dinamización Demográfica,

DECLARA:

Que esta Dirección Xeral de Familia, Infancia e Dinamización Demográfica ten previsto formalizar, xunto coa Consellería de Educación, Universidade e Formación Profesional, coa **ASOCIACIÓN ABUSO E MALTRATO INFANTIL NO. GALICIA (AMINO.Gal)** e as **UNIVERSIDADES DA CORUÑA, SANTIAGO DE COMPOSTELA e VIGO** o instrumento convencional arriba referido por un período de vixencia que abrangue dende o 1 de setembro de 2018 ata o 31 de decembro de 2020.

Que o instrumento convencional ten por obxecto:

O establecemento dun marco de colaboración entre as Consellerías de Política Social e a de Educación, Universidade e Formación Profesional, a ASOCIACIÓN ABUSO E MALTRATO INFANTIL NO. GALICIA (AMINO.Gal) e as UNIVERSIDADES DA CORUÑA, SANTIAGO DE COMPOSTELA e VIGO a través do cal se conciencie e sensibilice o profesorado e as familias sobre o abuso sexual infantil na nosa sociedade ao tempo que se lles proporciona ferramentas de prevención.

Para iso, acordan desenvolver o programa “POÑENDO AS LENTES PARA A PROTECCIÓN DA INFANCIA” a través do “Proxecto de difusión da Campaña do Consello de Europa para a prevención da violencia sexual contra a infancia “UN DE CADA CINCO” en centros de ensinanza de educación infantil, primaria e educación especial das cidades da Coruña, Lugo, Ourense, Pontevedra, Santiago de Compostela, Ferrol e Vigo.





XUNTA DE GALICIA

CONSELLERÍA DE POLÍTICA
SOCIAL

Dirección Xeral de Familia, Infancia
e Dinamización Demográfica



Que existe converxencia de intereses entre as entidades asinantes en orden á consecución do obxecto referido.

Que o instrumento convencional que se pretende asinar se fundamenta no obxectivo de ofrecer a orientación, o asesoramento e a formación necesarias ao profesorado e grupos de voluntarios así como a creación de grupos de traballo encargados de difundir e dar a coñecer á sociedade e colectivos e aos profesionais, centros educativos e centros de menores da Comunidade Autónoma, o problema dos malos tratos na infancia en todas as súas modalidades.

Para a súa consecución desenvolveranse as seguintes actividades:

- Formación presencial das persoas voluntarias que se levará a cabo nas cidades de A Coruña e Pontevedra en dúas sesións. Nelas procederase a explicar a organización do proxecto e o seguimento a cada centro participante.
- Creación de grupos de traballo formados polo profesorado e voluntarios que asistiron á formación descrita e que serán distribuídos por zonas e cidades.
- Difusión en centros educativos e centros de menores, a través do envío de cartas, concertación telefónica de citas e xa directamente a presentación da campaña.
- Seguimento do profesorado que decidise unirse ao Programa, avaliando o número de actividades e poboación infantil alcanzada.

Para o desenvolvemento das xornadas de divulgación-información da campaña e da formación do alumnado cóntase coa achega gratuíta de espazos facilitados polas tres universidades galegas nas facultades de Ciencias da Educación comprometéndose así mesmo na difusión do proxecto entre o alumnado de 2º e 3º curso de Grao facilitando ao mesmo tempo a súa participación nas actividades descritas.

A Xunta de Galicia, a través das Consellerías de Política Social e de Educación, Universidade e Formación Profesional, e a Asociación Abuso e Maltrato Infantil No. Galicia (AMINO.Gal) e as Universidades da Coruña, Santiago de Compostela e Vigo, comprometidos institucionalmente coa infancia consideran prioritario potenciar este tipo de actuacións e están interesados en cooperar na execución de programas directamente ligados coa consecución do benestar dos/as menores e familias dando a coñecer en todos os ámbitos todos aqueles proxectos que redunden no interese superior da persoa menor.





XUNTA DE GALICIA

CONSELLERÍA DE POLÍTICA
SOCIAL

Dirección Xeral de Familia, Infancia
e Dinamización Demográfica

galicia

Considera tamén de especial importancia favorecer a programas como o que se describe, que naceu no seo do Consello de Europa, o 29 de novembro do ano 2010 cando se inicia en Roma a Campaña contra a violencia sexual infantil “Un de cada Cinco”, que persegue os seguintes obxectivos: Promover a firma, ratificación e aplicación do Convenio do Consello de Europa para a protección dos/as nenos/as contra a explotación e o abuso sexual; e proporcionar ás persoas menores, as súas familias/coidadores e as sociedades, coñecementos e ferramentas para previr a violencia sexual contra os nenos, nenas e adolescentes e, deste xeito, crear conciencia acerca de todo o que constitúe violencia sexual contra as persoas menores de idade.

O artigo 96.2 da Lei 3/2011, do 30 de xuño, de apoio á familia e á convivencia de Galicia recolle a posibilidade de colaboración con entidades privadas sen ánimo de lucro para a atención a menores.

De acordo co artigo 2.1.c) da Lei 9/2007, do 13 de xuño, de subvencións de Galicia, o proxecto financiado ten por obxecto o fomento e desenvolvemento dunha actividade de interese social. Ademais, o artigo 19.4.c) da mesma lei establece que, con carácter excepcional, subvencionaranse aquelas actuacións que acrediten razóns de interese social e humanitario. Así mesmo, o artigo 31.2 –en relación co artigo 55- da Lei 13/2008, do 3 de decembro, de Servizos Sociais de Galicia habilita, por razóns de interese público e debidamente xustificadas, a subscrición de convenios singulares con entidades de iniciativa social debidamente autorizadas para a prestación de servizos sociais cando por razóns humanitarias ou de emerxencia social, ou ben cando pola singularidade das características da entidade, a especificidade dos servizos que presta ou a especial vulnerabilidade das persoas usuarias, non sexa posible ou conveniente promover a concorrência pública, como é o caso.

A execución material do programa que se desenvolve no clausulado e anexo deste convenio materialízase ante a insuficiencia de medios da Comunidade Autónoma, mediante a sinatura dun convenio de colaboración coa Asociación Abuso e Maltrato Infantil No. Galicia (AMINO.Gal) e as Universidades da Coruña, Santiago e Vigo.

A Asociación Abuso e Maltrato Infantil No. Galicia (AMINO.Gal) na actualidade conta cos recursos humanos e a estrutura necesaria para o desenvolvemento de dito programa, ademais dunha acreditada experiencia na prevención e orientación ás familias, a organización de xornadas e seminarios, así como a impartición de cursos a diferentes perfís profesionais, considerándose polo tanto idónea para a execución do dito programa.





XUNTA DE GALICIA

CONSELLERÍA DE POLÍTICA
SOCIAL

Dirección Xeral de Familia, Infancia
e Dinamización Demográfica



O convenio de colaboración terá data de efectos e vixencia dende a data da súa sinatura (prevista para o 1 de setembro de 2018) e ata o 31 de decembro de 2020.

Para a realización de actuacións obxecto do presente convenio a Consellería de Política Social achegará a cantidade de 102.607,81 €, con cargo á aplicación orzamentaria 12.02.312B.481.0, sendo a distribución plurianual a seguinte:

Ano 2018: 25.890,50 €

Ano 2019: 48.171,81 €

Ano 2020: 28.545,50 €

Así mesmo, a Asociación AMINO.Gal comprométese a achegar a cantidade de 2.864,00 € procedentes de subvención da FAPMI.

A sinatura deste convenio require de autorización previa do Consello da Xunta.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2. da Lei 1/2016, de 18 do xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

Asinado dixitalmente en Santiago de Compostela

A directora xeral de Familia, Infancia e Dinamización Demográfica

María Amparo González Méndez

